

雙流縣志

與景章兄投宇文樞密書

鄭樵

厚生天地間藁藁二十有八年矣樵生二十有四矣爲兒時楚楚便有脫略流俗志聞君子長者風卽規繩矩履不避風雨一求見焉首而還視閭閻輕薄年少蹴躡千百輩若躡秋毫始讀古人書而性真率不一一記憶憚作時下文章喜盤詰聲牙風雅古淡易春秋邃邁欲效之而未能也家貧無文籍聞人家有書直造其門求讀不問其容否讀已則罷去住曾不吝情寒月一窗殘燈一席諷誦達旦而喉舌不罷勞纔不讀便覺舌本倔強或掩卷推燈就席杜目而坐耳不屬口不誦而心通人或呼之再三莫覺春風二三月間弟兄二人手挈飯囊酒甕貿貿深山中遇奇泉怪石茂林修竹凡可以可人意向者卽釋然坐臥一觴一詠累月忘歸山林蓊蒼禽鳥不知人來爭食揮之不退牧子樵夫澤藪相逢呼而不就坐卽疑爲神仙怪物不問姓名睨而去或採松食橡澆花種藥隨漁狎獵優遊山谷間自得名教中樂地故夏不葛亦涼冬不袍亦溫腸不飯亦飽頭髮經月不櫛面目衣裳垢膩相重不洗而貞粹之地油然禮義充足弟兄親戚鄉鄰僚友謂爲癡爲愚爲妄不相輩行也而土木形質又好沖介自守不廣交游以求聞達用是見斥於世彌廣宇宙若無所容焉一見閣下便開懷許可推階前盈尺之地與之吐氣激昂青雲且熟視詳聽了

無難色已而旌節顧蘋蘩中挑剔其所不知裁抑其所未及使山野之士聞之色寒盡戴白汗四
匝胸中覺無膏肓疾不知周公吐握何以過此而機宜學士落落穆穆精神滿腹居然是出羣之
氣真名家駒也不鄙寒微兩屈輿從手授忠恪康濟大略千萬餘言承顏按詞調欵移時布衣受
知於此極矣倘犬馬之骨未墜於地當效首領以報故不敢不盡其所能亦不敢不盡道其所能
厘也樵也欽崎歷落可笑人也嘗言文賦體物瀏亮籠天地於形內挫萬物於筆端春雲秋月無
下手處疑不若屈宋賈馬憑凌造化灑括風雲所得驚邁絕去翰墨谿徑語出山間筆歸圖畫田
夫女子諷道不容口疑不若鮑謝李杜迴旣倒之狂瀾支已頽之岱嶽澄世所不能澄裁世所不
能裁千條析理一緒連文捍壁周孔俾申韓楊墨佛老重足而立疑不若孟荀揚韓天才英俊豪
拔不羣朝野挹其風格人物推其表燭落筆作文言語妙天下干將莫邪難於爭鋒如日出冰融
焜耀人耳目若不敢正視者疑不若王楊盧駱或掉三寸舌抃縛王公或清持公論收降物議如
扣鐘如懸河如玉屑如琴瑟聽之洒洒令人忘倦疑不若蘇張裴樂鍊達撫宏博攬古今出入幾
皇馳驅綿邈如經笥如肉譜如五總龜如人物志如入宗廟觀禮樂器疑不若遷固向歆經綸韜
略竊肆理窟畫地布基豈不可犯如入武庫中但見五兵縱橫疑不若孫吳英衛乃若義分明於

霜信行直如弦平生之言握手入地不軼毛髮厚也樵也仇牧苟息其人也利不可回威不可卻
義存友道視死如歸瑟瑟然英魄與秋霜爭嚴厚也樵也程嬰杵臼其人也仗節奉使有死無二直
挫彪虎而奪之氣其英姿激奮動人毛髮厚也樵也毛遂藺相如其人也巖巖清奇壁立萬仞精
神動天威毅貫日其義氣凜凜逼人若有寒色厚也樵也荆軻聶政其人也孤城圍急飛鳥不敢
度獨能身質鈇鉞極危急於薤醢中壯圖諒節頽嵩華不吾壓使英烈之命不委於草莽厚也樵
也解揚其人也鐵腸石心志勤忠孝路全君父銜笑就刑生爲萬夫雄死爲壯士鬼厚也樵也紀
信其人也抱松筠之節歲寒不凋堂堂直道讎惡豺狼若象牙若犀角疑有不可拔氣厚也樵也
蘇武其人也膽幹應辨隱有城府寧五畝之旗斬郅支之首懸旌萬里揚威毘西何其壯哉厚也
樵也陳湯其人也生不封侯死不廟食非丈夫也勃勃雄飛氣吞逆虜期以革裹尸而後已厚也
樵也馬援其人也標格逸亮灑出物表台閣生風奸雄斂手砥礪名節慨然有澄清天下志厚也
樵也范滂其人也褰裳赴義擲足輕生雖白刃礪骨而峯岬不頓嘔肝瀝血號呼欲絕天地聞之
無置顏處厚也樵也向雄其人也主憂以辱主辱以死篤在三之義雖崎嶇晉陽而端冕繾綣臣
節愈恭義血點點模糊御服誠疾風中勁草厚也樵也稽紹其人也張膽厲聲矯首奮色臨刀鋸

鼎鑊而言詞益壯吐忠飲憤含胡而絕在今與古蓋千一焉厚也樵也顏杲卿其人也一腔義氣剗奸剔邪而其燄萬丈使蜂毒狼威絕然疑阻而不得逞其禍害厚也樵也何蕃其人也擁疲卒嬰孤墉抗方張不測之虜梗其喉牙掣其首尾生雖不能報君死當爲鬼以擊賊背裂面血疊尸通道古之烈夫也厚也樵也張巡許遠其人也此志不展則棲遲林野長嘯泉石負耒而耕耕破北隴春煙叩角而歌歌殘南山夜月一邱一壑一山一雲便足了一生事下視勢利而胸懷洒洒然者厚也樵也向子平寶孝威其人也然則厚也樵也何人也沈寂人也仁勇人也古所謂能死義之士也謂人生世間一死耳得功而死死無悔得名而死死無悔得義而死死無悔得知己而死死無悔死固無難恨未得死所耳今天子蒙塵蒼生鼎沸典午興亡卜在深源一人耳厚兄弟用甘一死以售功售名售義售知己故比見閣下以求其所也王彥章有言人死留名虎死留皮史臣謂其真忠蓋天性也厚樵自卜其兆若胡越相視則知人豈真易哉閣下筦樞庭爲天子大臣厚樵風塵布衣在天地間一螻蟻數當代文伯閣下實司之厚樵未許籍衙官列閣下出入三朝爲時元老厚樵黃嘴經生耳且閩蜀相距彌萬里遠近之相懸貴賤之相懸賢不肖之相懸先進後學之相懸其間事宜百數驛舉烽燧傳呼不相及者何以三見問而分不間毛髮蓋磁石取

鐵以氣相合固有不期然而然者今既蝸客蠹淺不逃鑒察當展盡底裏以俟採擇厚逸邁而癡樵幽邃而愚厚癡絕樵愚絕厚於世俗有領袖樵於人物有林藪厚見理如破竹迎刃而解初無留手樵見理如攻堅木終自擘折稍遲耳厚於文如狂瀾怒濤滾滾不絕樵於文如懸崖絕壁向之瑟然寒人毛骨厚仰視韓愈如不及樵下視李白如常人厚下筆如迅馬歷隴阪終日馳騁而足不頓且無蹶失樵下筆如大匠掄材胸中暗有繩墨每作文文成自不曉其義必求厚爲之解說然後胸中曉然者厚常曰吾弟文章合有神助不然何得乃爾厚得之易得樵而後峻樵得之紛得厚而後理厚得樵而城壁固樵得厚而朱紫分厚貞粹之地可容樵千萬輩而峯岨孤峭樵自出厚之右厚應辨多方略樵遲鈍有隱思厚臨倉卒若素成綽有餘波樵臨倉卒若暴疾昏黃徐而圖之了一無一塵相累使厚司台諫則世無豺虎跡使樵直史苑則地下無冤人智解文鋒氣挫虓虎使於四方不辱君命則厚優於樵正固幹事不避鎡鋸能辛苦其身爲紀綱先樵亦優於厚當官正色不畏強禦則厚優於樵小心事君繾綣朝夕樵亦優於厚至當廟廊擁幼君當大節而不可奪則厚能之樵亦能之臨財廉取與義出入無私交之行可爲百僚則厚能之樵亦能之斟酌治體如扁鵲治疾盡見五臟凝結解紛排難如庖丁鼓刀無少留刃厚能之樵亦能之厚也

樵也平昔囊櫃中短長不出此耳推短論長於閣下有望焉古者將門必有將相門必有相故蕭何之於韓信羊祜之於杜預王導之於紀瞻李勣之於戴胄皆相首尾以成功名厚樵生平用心於古人閣下亦以古人許可幸犬馬之齒未在桑榆正當戮力周旋閣下著一鞭於中原使白骨更生寒灰復然特反掌耳惟閣下置之肝臆而終始之

靈星門辨

黃 鐸

周制仲秋之月祭靈星於國之東南漢高祖八年命郡國立靈星祠蓋靈星之名天原發微載爲東方蒼龍左角天田二星主農穀祥其中進賢一星主文明之祥明則賢才進故文廟前門以靈星名焉今人於靈星字多從木從品失其義也又考通志載鮮瓘廟學門記內云古營造法式以上天帝座廟三星曰靈星王者之居象之故以名門先聖爲萬世師古今通祀袞冕南面用王者禮樂廟門之制悉如之是亦一義併載之

何之故曰...
於古人...
更生...
縣志...
上...
東...
開...
靈...

石經跋

宇文紹弈

制置給事內翰胡公以道德文章華我國家其經濟事業似唐李文饒而風節過之方論事上前慷慨激烈動寤淵聽在玉堂瑣闥益據所學裨贊聖聰訂正國是被寵隆異冠絕在廷公每以天下自任推六經精微寓諸日用至於屋壁所藏殘編斷刻收拾無遺常嗟經隸書最古旁搜博訪合諸家所藏得蔡中郎石經四千二百七十字有奇以楷書釋之又得古文篆隸三體石經遺字八百一十九并鑄諸石永貽不朽按范史稱蔡邕自書冊使工鐫刻酈道元注水經亦云光和六年立石於太學其上悉刻蔡邕名則大字石經出於邕筆似無可疑若夫三體石經以儒林傳考之則其書已出於東漢時水經乃云刻之魏正始中意者魏刻殆以補漢刻遺亡耳

內江外江考

劉沅

左思賦蜀都有二江雙流之句而其名相沿言水道者遂依以爲說然思未至蜀特諮訪以成文揚雄亦言二江蓋皆據貢而言江沱耳後人以內外二江當之或又以爲雙過郡下之水其實不然安可以無辨哉按華陽國志云禹導江後沫水尙爲民害李冰釀二渠鑿離堆又鑿郫江灌漑民田而蜀遂爲天府沫水皂江也與南安嘉州之沫異江從岷山而出其源甚多入灌口者一自西水關來一自白沙江來左右二流會於邑城之西水由離堆外行無山約束所以驚漲常爲民患李冰析爲二渠附山趾者曰內江較遠者曰外江山趾有離堆離堆也堆也山足支出爲陵與山若不相屬故曰離堆冰鑿堆以通水誅其下之潛蛟而水始安流故一曰流江至城東南復鑿二江右水至成都城南爲府江左水至成都城北爲郫江其分水之處於今右有鎖龍橋左有太平橋蹤蹟顯然其冰穿山北流者爲三泊洞是曰檢江檢制也冰所特制故名曰檢其正流乃爲流江內江經由郫邑溉田無數美利由冰而興故志特傳其功若外江之水亦惠於民然禹導江以後原壤即蒙其利非若內江之由冰而創也灌邑本導江縣因冰治水後灌漑由斯而肇故旣曰灌口亦以名縣外江則金馬江岷江之正流也由其舊源呼之亦曰皂江此水直趨東南不

特全蜀之水皆匯卽金沙江亦自敘州而入故禹貢紀中國治水之始以之爲正而不言金沙其
鄆江湔江云者自灌口而下經鄆曰鄆江經溫曰湔江實則內外江所析也水利日以興溝洫日
以繁隨其所在而異名焉目擊者弗稽著書者耳食將安取衷哉舊內以江爲沱而不知禹導江
時尙無此水謂天彭在黃勝關而不知誓水碑卽在彭門至冰治水則以消息二江爲都江堰增
減之法今猶在內江北岸沈石犀五則今鄆彭溫雙皆有之矣省垣將軍署側之石牛古石牛門
又在石犀之外溯內外江之名其始特以灌城遠近別之而後人牽混凡在成都以內者爲內在
外者爲外而天彭潛維諸水同會而下者又名縣曰內江名稱得失於義何關損益特此二江之
實不明李冰紹禹之勳不著文人紀載非苟徒悅目固將存古人之功德留其事以勸將來若蒙
昧而書之亦仍譌而語之奚用是汗簡牘爲耶

宇文使君墓表

張 枋

君氏宇文諱師獻字德濟世爲成都人曾祖宗象贈太師魏國公祖邦彥任尙書屯田員外郎贈太師蜀國公考粹中任尙書左丞彙南陽郡公贈少師宇文氏受姓系世之詳已見於少師墓碑故參知政事楊公椿之文始少師與其弟簽書樞密院事虛中俱以文學論議被遇固陵極翰墨之選煒然一時少師晚歲歸安於蜀蓋倦於世故矣長子師牧賢而有文不幸早世少師念之甚君是時方童稚已挺然不凡日讀書講問娛侍於前少師每爲慰釋謂是兒且長殆能繼二父之業少師故時賓客多英傑見者莫不悚然謂宇文氏復有子矣少師捐館舍君甫年十有二執喪盡禮如成人事妣福國夫人黃氏奉承顏色不懈而自奉極儉薄人不知其爲貴公子也季父直龍圖閣侍中素重許可尤器君懋以向學先用樞密公恩補承務郎服除差監潭州南嶽廟考滿知漢州德陽縣丞改知綿竹縣丞暇則慕崔新立之爲痛掃溉以種學積文爲事且從其鄉之老成故工部尙書員外郎李公良臣及其秀士黃鈞李流謙游聞見益以廣聲稱益以著已而兩丞銓部以微文俱不報更從外銓擬監漢州什邡縣酒稅居其官惟謹改監漢州在城商稅務未上會詔從臣各舉所知楊公椿時爲尙書兵部侍郎以君博學有守聞有旨詔赴行在時紹興三十

年也君念福國夫人年高不忍遠去力辭差潼川府路提舉常平司幹辦公事未上改成都府轉運司主管文字丁內艱哀慕幾不能全免喪楊公已在政府力挽君疏下亦竟不前差四川安撫制置使司幹辦公事歷事兩帥其前者寬縱多慢君據義不撓其後者威儀或過君彌縫其闕幕府歸重先忠獻公雅知君言於朝遷知簡州簡故少事君復臨以安靜民甚便之歲歉饑民爲盜連數郡君所部先事區處得食迄無從寇者以暇時掇論時事之要編白於朝宰相亟稱之未滿秩移知綿州綿爲大州適承頽弛之後帑庾匱甚君獨整科條察蠹弊節用度未幾而經常不缺郡舊有冤獄個人殺主之僕而誣其主外台執偏見不釋主家死於獄者三人其他亡辜逮繫死者又以十數方春天爲雨雪地爲震裂兩使者不能決更送君所君詳究其牘得情數語折之個人引服致之法人謂可以少謝死者冤也事益省卽理緝學校舍其士者行鄉飲酒禮使敦長幼之節在郡再歲樞密使王公炎宣撫四川以請改知閬州錫贊書甚寵閬故嘗爲宣撫使所治地尤重事且夥君先立之規模上下趨令惟恐後率以夜漏未盡數刻秉燭出視事不以爲勞亦不覺有疾苦狀一夕與客評論書史自若旣寢家人聞喘息若不屬亟視已不能語醫不及進藥而終享年四十有七實淳熙元年七月二十日積官承議郎以郊恩賜五品服娶郭氏故朝議大夫

知辰州黃中之女子男一人曰紹訓女二人長適唐剛文次許適梁秩皆進士是歲十有二月晦歸葬於廣都縣靈溪鄉附於蜀國公塋側君天資忠厚平易與人交久而不厭或少忤亦未嘗衰家居婢僕不見其惡聲厲色而至蒞官之際則簡嚴自守所謂柔而有立者伯兄既早世事嫂甚謹待猶子恩義無間言嗜讀書稽考至忘晝夜論事貫穿今古爲文辭贍蔚有餘地所著甚多藏其家初君以二父世科爲念刻苦習進士業爲進士者多推稱之兩以鑠廳試類省輒下益力後雖以領州符猶不置蓋終其身以是爲歎某嘗以謂自先王教胥子之法壞大家世族不得咸盡其才其下者苟從祿利不樂親文墨事至其間讀書欲自表見者則又不屑其世祿反以從進士覓舉得之爲榮噫昔之人所望於胥子者豈爲是哉若君居家孝友蒞官廉平溫厚博雅於以進德孰能禦之顧區區猶以是爲歎何哉某之先妣夫人實爲君從女兒故某於親鄰間講問君行義爲詳紹訓奉其母命萬里致書請銘不敢辭銘曰宇文入蜀三百年支垂派別族益蕃少師弟兄大厥門迭執鴻筆司皇綸二府聯登體貌尊君生其家愿而溫被服儒素遠世紛編簡浩博資剖論剖符三州民所恩外若坦易守則敦人言餘慶茲實存誰其挽之排帝閭哀哉玉立歸邱原萬里方駕尼其轅尙有銘詩賁來昆